

【一碗甜菜卵花湯】梁愛珠原作

十月冬禾割忒了後，天時漸漸轉秋咧，天氣也涼爽咧，阿姆个菜園肚，種當多菜頭、大菜、大心菜、包心白、結頭菜、高麗菜。這兜菜一看就知收成後，準備年下揸去街路賣，有伸个斯晒乾入盞園起來。這兜事全全係僱兜細人仔愛搵做个。菜園肚角頭角尾脣頭，看得著另外有種「甜菜」，也有人講係香甜菜、皇帝菜，有一息仔清淡菊花香。這甜菜無論係用來煮湯、焗過滴兜油搵醬、單淨炒，斯非常清甜爽口，做得講係客家人最愛个風味。

菜園肚一大遍个菜頭、大菜好摘咧，大人細子背痠痠、頭磬磬仔一頭一頭擲，做到腰骨痠軟，一半下就想企直來伸一下腰骨。趕日頭花出來，菜頭洗淨剝埕禾埕晒，大菜吊在竹篙頂晒，臨暗仔收轉來用大醃缸滷鹹後，用腳來踩，就變鹹菜，續等過晒就係鹹菜乾、菜脯乾。一雙手一雙腳，因為分鹽水浸忒久，十隻手指頭膠腳腫，長下必到血漬漬，也愛刻耐仔忍等痛搵手做，大人吩咐个事毋敢推，總講爺哀希望屋下過隻好年。

有一年冬下頭，堵著寒流來，濕漉漉个天時，這粗重个事一年過一年，儕儕做到腰掛背吊，僱毋堵好嘎冷著，身體一陣寒一

陣熱，作燒咧，人懶蛻蛻仔。該時莊下時行家家屋屋廳下、壁頂都有吊等一種成藥，安到「家庭平安良藥」个藥袋仔，袋肚有傷風感冒个、顧胃腸个、顧筋骨痠軟个、著傷膏个、貼个藥膏項項有，放藥包仔个人，逐隻月定時會來換添藥仔，一隻月算數一擺。阿母遽遽尋出一包退燒藥分僱食，過幾下日燒還係無退，燒到會燒人，歸身軟怠怠仔，該量時生活清苦，細病無出莊去街路分先生看。

阿姆心肝肚掛吊到無結無煞，記得該日臨暗仔發風落水，佢跔工著等水衣去菜園肚割甜菜轉來，煮一碗燒燒个「甜菜卵花湯」兜在眠床脣，扶等僱跔起來憑<sup>1</sup>等佢个膺身，一湯匙一湯匙舀分僱食該時，有一種清甜个味緒，過無幾久黏時潑大汗，燒漸漸仔就退忒咧，僱知阿姆種个甜菜摻雞卵係準備愛賣个，平常時毋盼得食，這下為著子女个身體愛趕緊復原，爺哀惜子連心，仰般就有辦法。

想起頭擺農業時代，細人仔發病時節，爺哀舂頭磕額尋草藥材，病症無起色時，正會去街路尋先生看，爺哀就背囊背等三步做兩步趕緊行，窮苦到連一輛腳踏車就無。一碗簡單个「甜菜卵花湯」，心肝肚就張淦淦个愛。難怪「甜菜」也有人講係皇帝菜。子女著病時有爺哀个服侍，佢俚做子女个有影就像細皇帝樣。

<sup>1</sup> 憑：音 pen<sup>+</sup>；靠著。

108 年全國語文競賽客家語朗讀文章國中組（海陸腔）

編號 02 號

【耕種人个子女】陳米英原作

頭擺个生活，六月天公會噍薤菜就愛停動，正經係日日做到兩頭烏。

記得還細時節，阿爸食个頭路係鐵路局个道班工，也就係擎鐵鎚做鐵路个工人，逐日屋下先做一脩事正去上班，所以阿爸个手腳盡煞，不管做麼个事情都盡有煞氣，佢兜細人仔，乜無人敢推懶，尤其係緊工時節堵著風搓天，一時間喊無師父，屋下又無人好換工，乜喊無工人，全部就搶等愛收成自家个禾穀，若係慢著一日半日，該橫到歸坪歸田个禾仔跔等就生芽，一來無法度用機器收割，二來生芽个穀又賣無價，大半年來个辛苦就分風搓搥到淨淨，正經係膝頭就會出目汁。該量時个莊下人較老實，無像這下个耕田儕較有常識，會申請政府補助，在佢个印象中，長下聽著阿爸、阿姆道嘆，耕田人看天食飯，天係無撿你食，做死乜無人賠，斷真有影哦，難怪會有「人害人肥卒卒，天害人一把骨」个俗諺，這係天災，無奈何，佢俚還係愛認命、順應天理。

想起頭擺，佢屋下个細人仔各有各个事愛做，細俚仔愛掌牛、割草；細妹仔愛掃地泥、洗衫褲、撿樵、晒穀。講著晒穀，

緊工時節家家屋屋都愛自家晒，就算請人也無人冇閒搵手啊！屋下座大个阿姊全部嫁忒咧，伸著佢這講好聽安到「滿女」个，就愛揸起晒穀个擔頭，想著該甲零地个穀，全部愛用祛齊，一祛齊一祛齊硬掃到淨，正經係手工个哦！這下想起該咬人个日頭，歸身汗流脈落，做到出油个樣仔，發夢都還會驚哦！毋過牙根齧等又乜過來咧。

這下無共樣咧，在田肚，機器行過去就搥到淨淨俐俐、好勢好勢，黏時載去農會交濕穀換現金，實在有方便。頭擺佢俚兜細人仔毋使爺哀講，該做个事情有頭有尾做到好好，讀書人讀書寫字係暗晡頭食飽夜，大人在天時坪寮涼泡茶該時，佢俚在廳下抑係灶下个桌頂寫，從來乜毋識無寫忒，第二朝晨還愛比人較早到學校。想起讀小學該駁仔，係堵著落水天，赤腳嫵踏，一領水衣布抵等，半行半走去學校，該無鞋好著个日仔，係毋堵好踩到蟲蟻，斯走頭無路驚到半生死，回想起來，有時還會打激顫呢？在這時代有時講分學生仔聽，無人會相信哦！

時代一直在該進步，生活乜一直改善，電子、電訊取代手工个日仔，頭擺艱難困苦食著毋好个日仔，練就佢這下賺食个本等，雖然賺無多，但係最起碼个生活，毋使摻子女伸手乜過得日仔得，永遠保留等客家人勤儉堅耐个精神。

108 年全國語文競賽客家語朗讀文章國中組（海陸腔）

編號 03 號

【屋下該扇壁】邱坤玉原作

佢從細戴竹籬茅屋，冷天勉強做得防風，熱天做得抵涼遮水！

阿爸在日本人個會社肚，領著種甘蔗、改菜園、結石腳個頭路。當時分著一支鑊頭、一支擔竿摺兩隻畚箕，就恁樣日合夜無閒做到兩頭烏。正式難耐，日仔無恁簡單過——逐日就恁認真做，但係領該毋成錢，過該食番薯籤摻米粒個日仔。生活都過毋得下去咧，哪有辦法整出體面個屋場？好得還起得起一間蔗葉搭個茅屋，做得起一座土磚個灶頭，全家大細總算有地方好跔，總算毋會打露！

茅屋個壁係用濫泥敷竹籬起起來個，難免會有必縫。到冷天個時節冷風在必縫尖落來，冷颼颼仔實在冷到會死！到熱天個時節，該就鬆爽哪，望毋得佢鑽落屋肚來。

屋下該扇壁正對大門，係屋肚最闊個壁，乜係佢兜屋下最鬧熱個壁。該壁當像學校個公佈欄，掛等一隻日本製個掛鐘，還有阿爸摺阿媽結婚個相片，阿爸著等西裝摺阿媽同等西式個白紗羅帕，阿媽明顯矮阿爸兩隻頭那，兩儕牽等手盡靚。

該扇壁乜係佢兜屋下最光榮個壁。先用剪開個肥料袋貼等做背景，頂高過貼等大姊做洋裁時，靚靚個日本妹相片；有生著相貌堂堂個大哥，摺野狼 125 共下翁個相片；有二哥去成功嶺受訓剃光頭個相片；還有細姊在學校學煮菜時個笑容，生活中個紀錄全部貼在該扇壁町。

最湛個係兄弟姊妹摺自家領轉來個獎狀，貼做一排一排，該係最光榮個事，大家就恁樣拚命在該領獎。該一排排個獎狀本旦係打拚來個光榮，告知阿媽講：「噃！用獎狀貼等，壁較毋會過風哪！」哈哈！害佢兜分阿媽撩到目汁都會跌下來，正經係窮苦人家個辛酸啊。

當中有一張獎狀對佢一生影響最大。係先生來屋下家庭訪問過後，校長先生頒個「環境衛生獎」，先生講雖然佢兜戴個係茅屋，毋過地泥掃到金金、茶杯茶盤搓到白白、壁頂獎狀排到齊齊，還有屋下頭前、左右兩百公尺都掃到淨淨，值得表揚。

在該時代，大自家戴個屋全係茅屋，該確實係窮苦人個樣仔，空窿空殼，斯伸著壁頂貼等個「獎狀」，該係一條生活下去個希望。係鼓勵窮苦人家個子女揸忒鑊頭、齧等牙根去讀書，讀出希望，爭取將來有機會坐橫桌，正有出頭天個機會。

三年水流東，三年水流西，跔等時間個推搥，運勢乜會變化。戴三十零年個茅屋，阿爸時來運轉興旺起來，就起起莊肚第一間洋樓！

【細叔婆】李雪菱原作

佢還當細个時節戴在伙房，記得屋下个伙房肚有當多人，這下大伯戴在上片析，佢兜戴中央，細叔戴下片析。就恁樣，佢兜細人仔逐日就上片析下片析走上走下。

頭擺中央伙房戴大叔公摺細叔公還過佢兜共三房，細人仔當多，叔伯兄弟愛掌牛，老弟長下跔佢兜去掌牛、釣蚬仔、覓蜆仔、拈田螺，無一項毋會，阿爸毋分佢跔，驚走去泗水仔，無大人在脣頭當危險，係講忒暗轉來，分阿爸抓著，該就壞蹄咧，會嘍皮帶<sup>1</sup>哦！

佢兜細妹人還細細仔，就愛自家暖水<sup>2</sup>洗身、洗衫褲、縈草結、煮飯、焮茶……，麼个都會。佢爸食頭路，屋下當早就無蒔田，毋過種盡多弓蕉，大出个時節，佢兜愛搵手，孩毋起就用扛个。

共房頭个細叔公當早就無在咧，毋識看過，細叔婆生來細隻細隻，當肯著藍衫，有烏色个、藍色个，著起來當好看。佢盡肯在禾埕尾梳頭那毛，看起來當長當長个頭那毛，梳一輪<sup>3</sup>兩輪，縈

上去用紅索仔縳起來，再過几幾輪變做一隻饅頭，有時節會紮兩隻盡靚个髻髻。佢兜幾個細阿妹仔當好坐在屋簷下看佢梳頭，看到昏昏哦！心肝肚恸：下二擺大咧乜愛像佢恁樣，著靚靚个藍衫摺梳靚靚个髻髻頭。

係講屋下个大人去田町做事个時節，細人仔摺細叔婆共下留在屋下掌屋，大个渡細个，下把遠遠看著鷓婆个烏影飛來，細叔婆就拿祛齊<sup>4</sup>在地泥下緊敲，雞嫵會咯咯滾緊喊，細雞子會煞煞走去雞嫵翼下園等，係走較慢个，就會分鷓婆拋走，這下想著還會心肝恸恸颯哦！

該下見擺堵著落水天，細叔婆會喊佢這兜細妹仔遽遽量米拿去挨，轉來好做水版。嘴還會緊念：「一升在來米一升水，一半做甜个、一半做鹹个，甜个愛摺烏糖，緊煮緊攪，攪勻倒落碗肚，七分滲就好，炊二十分鐘愛打開來用箸試看會黏米漿無，係毋會就食得咧。鹹个愛炒配頭，菜脯、香菇、蔥頭切幼幼摺蝦米共下焮香，擠一息豆油就好勢咧。」聽細叔婆講到口涎波潑<sup>5</sup>，佢兜幾個人就做到攬手捋腳<sup>6</sup>。

老古人講：「一人有福，牽帶滿屋。」伙房肚有細叔婆，一生人都有講毋忒个生趣事，有笑、有噉，麼个事情都牽牽連連，佢兜實在有福！

<sup>1</sup> 嘍皮帶：音 sai`pi dai`；被修理，責罰的意思。

<sup>2</sup> 暖水：音 non`shui`；燒熱水。

<sup>3</sup> 輪：音 lin`；一圈。

<sup>4</sup> 祛齊：音 kia`ce；竹掃把。

<sup>5</sup> 口涎波潑：音 heu`lan`po`pad`；口沫橫飛。

<sup>6</sup> 攬手捋腳：音 lu shiu`lod`giog；捲起衣袖拉起褲管，要動手的樣子。

【面仔】魏秋娥原作

民國五十年左右，在僱還細個時節，僱屋下戴在山肚，屋脣有兩大坵土地，一坵拿來種柑仔，另外一坵種番薯。該量時有人成功接枝一種新品種个杻仔，逐叢樹仔打當結，逐隻杻仔又大又靚，咬起來脆脆又當有水，大家摺佢安到「月杻」，乜有人講做「四季杻」，在該時當時行種「月杻」，聽講做得賺盡多錢，所以阿爸摺全部个番薯田，改種「月杻」。柑仔摺「月杻」係屋下主要个收入，逐朝晨阿爸阿姆就會揀等果子去市場該搭仔賣，僱摺阿哥、阿姊乜會揀揀。

阿姆教僱兜面頂該層定著愛擇外型較靚又勻大个果子，一隻一隻排到齊齊，僱俚客話安到「面仔」，目的係愛分市場个水果販來割貨去賣，「面仔」排到越好看，屋下个果子斯賣越多；若係排到毋順人客个意、毋上眼，水果販該兜頭家、頭家娘毋肯摺僱俚割貨，僱兜斯愛一斤一斤慢慢仔賣，成時賣到當晝還賣毋到二十斤。阿姆講：「做生理斯係恁樣，牛眼核擷屎肫——看各人个本等，麼人个『面仔』較合水果販个意，分佢兜行兼來，正有機會請佢兜試食果子，僱俚屋下个果子正做得賣淨淨。」

成下僱兜乜會幾斤幾兩零星賣，識堵著人客，用手指甲這搵<sup>1</sup>一下，該搵一下，想試看杻仔有水無？罅脆無？分人搵過个杻仔黏時多加幾點烏點，恁樣个杻仔就賣毋出咧；僱兜當驚該專門揀「面仔」來搵个人客，因為分佢搵過个杻仔斯變媠咧，賣出个價數較低，箱肚伸个杻仔就還較賣無價咧！該揀肥擇瘦个人客，又好講價，講來講去，又買無幾隻，阿姆總係當愁慮，試著自家無嘴碼當毋壁，講人毋贏，賣著恁少錢。

僱想著好辦法，僱摺杻仔切做一細坵一細坵，用鹽水拋一下，見看著人客斯行前去請佢試食，僱細細聲講：「阿叔，阿姨，請你試食看哪！僱屋下个杻仔當脆、當甜又當有水，毋係斯面頂个較大隻定定，籃仔肚个隻隻像僱肥肥大大，當好食哦！拜託你試食看哪！」市場肚來往个人客正式全部行兼來試食杻仔，買盡多杻仔轉去，又安謐僱「恁得人惜」、「恁有嘴碼」、「恁會做生理」、「笑容恁甜」……，買過个人客加兩日又來交官，回頭客盡多，笑等問阿姆：「頭家娘，你屋下這隻『面仔』當靚當大隻！賣幾多錢？」一頭講一頭笑，阿姆講：「這隻『面仔』係天價，賣毋得！賣毋得！」

屋下个生理緊來緊好，阿姆講全部係僱个功勞，僱實在當暢！

<sup>1</sup> 搵：音 zhim<sup>ˇ</sup>；以指甲刺入。

【黃杳阿婆】徐姿華原作

阿富叔公做里長三十零年咧，佢當熱心，逐日都會騎等佢該輛老奧多拜，滿哪仔巡巡看看，佢斯像僱兜莊肚个伯公，守顧這莊頭。阿富叔婆隨時都打扮到萋蹕萋蹕<sup>1</sup>，佢會在耳空脣楔<sup>2</sup>兩蕊含笑花，摺佢企較兼兜斯會鼻著含笑花个香氣。莊肚个人感謝老里長服務大家恁用心，逐個都當敬重阿富叔公兩公婆。

阿富叔婆在屋脣種一頭含笑摺一頭土杳仔，逐日打早，佢愛去伯公下換神茶、燒香个時節，會摘幾蕊含笑去敬伯公；佢也當顧佢个杳仔樹，該頭土杳仔摺這下个品種無共樣，土杳仔當硬，無當多肉，黃黃个杳仔心，子又密又硬，實在無當好食，毋過，頭擺無麼个零嗒好食，細人仔總係脍脍<sup>3</sup>看等該青溜溜个杳仔，一到杳仔略略轉色，黏時都會分這兜細孬仔摘去食，成下佢兜係摘著忒青个，咬著還澀澀，將就斯擲在杳仔樹下，阿富叔婆看著斯會發闕，一有細人仔行兼來，佢會嚶嚶滾<sup>4</sup>緊念：「恁討債<sup>5</sup>！恁討債！杳仔吉好食斯拿來摘，無採人个東西。」「這兜細人仔係無人教招係無？仰般會恁無規矩？」細人仔聽著阿富叔婆緊罵，

<sup>1</sup> 萋蹕：音 ci`ciog；光鮮亮麗。

<sup>2</sup> 楔：音 siab；塞。

<sup>3</sup> 脍脍：音 goi`rhog rhog；想吃流口水的樣子。

<sup>4</sup> 嚶嚶滾：音 giâu giâu gun'；形容抱怨或不滿的聲音，多用於罵人。

<sup>5</sup> 討債：音 to`zai~；此處指浪費、糟蹋。

斯毋敢再過去偷摘杳仔食咧！

無細人仔來耗爽<sup>6</sup>，幾隻禮拜過，該頭杳仔樹打到當結，樹頂个杳仔也對青青慢慢轉黃，遠遠都鼻得著黃杳仔該熟水<sup>7</sup>个香味，錫來枵鬼个細人仔，也錫來歸陣个蜂仔飛上飛下。毋過，這兜細人仔，毋敢行忒兼，驚怕阿富叔婆又追出來罵。聽著細人仔聲，阿富叔婆正經打開佢个柵仔門行出來，手町擎等一支長長个筐仔<sup>8</sup>，該兜細人仔一看啊著，發痴驚斡頭起腳花斯走，嘴町還緊喊：「阿叔婆擎竹仔愛打人咧！阿叔婆愛打人咧！」阿富叔婆在細人仔背後大聲嘶：「噯！細人仔啊！等下仔！毋好走啊！」，該陣細人仔聽著，還較驚，瀉到看毋著魂影。

第二日下晝，阿富叔婆攞等一袋杳仔，企在對學校愛轉莊肚个橋頭，等細人仔放學；細人仔陸陸續續行到橋頭，阿富叔婆笑咪咪喊：「來啦！杳仔黃咧！做得食哩啲！」過拿出袋肚个杳仔愛送分細人仔食。正開始，逐儕你看佢、佢看你，麼人都毋敢拿，毋過佢手町香甜錫人个黃杳仔，像摺細人仔攞手樣，又過一下，阿雄先行兼去拿來食，逐儕看著正敢去拿，兩下半歸袋个杳仔斯分細人仔拿淨淨咧！

原來，阿富叔婆毋係驚人食，佢愛等佢个杳仔黃咧正愛摘，正做得食得著土杳仔最好个味道啊！對該擺起勢，莊肚个細人仔毋會再過驚阿富叔婆咧，毋知哪個細人仔帶頭个，最尾逐個細人仔看著阿富叔婆做下親暱暱喊佢：「黃杳阿婆！」

<sup>6</sup> 耗爽：音 ho`song'；糟蹋、耗費。

<sup>7</sup> 熟水：音 siug shui'；瓜果長成至可收穫的程度。

<sup>8</sup> 筐仔：音 fe`er；捉魚蝦或昆蟲的長柄網具。

【 僱心肝肚个客家味緒 】楊世玲原作

客家菜摻客家人共樣共樣，一種係重油重味、一種係重情重義；一種係鹹甜清楚、一種係恩怨分明，半點斯無走盞！

剁盤个雞鴨大體係自家屋下畜个頭牲，熟水又過無注藥仔，專門食飯糝、菜蓋<sup>1</sup>，罕得食飼料，所以皮又貴又油，肉又甜又香。自家做个橘醬，酸合香，滷兜豆油搵落去，阿媽哀！該舌嫲係無絹較纏兜，有影會嘎吞落肚屎去啲！還有該滷豬腳，豬腳剁到大嫲圈，滾水燻<sup>2</sup>啊過，正用細火燂分佢出油，蒜頭米愛掛等皮，敲敲仔放勢落，加兜豆油，靚色又鹹香，過來定著愛用專酒做毋得放水，共下去燴到皮韌肉酪，係驚緊撩<sup>3</sup>會摻蒜頭米過豬肉皮舞到溜皮，就將該鑊仔兜起來用拋个，鑊鏟都毋使停動著，差毋多會好咧，正放兜冰糖落去，金頭<sup>4</sup>又好食！係有這味，食加成碗飯定著無問題！

粢粢係客家人桌席頂个招牌，年年節節、好事歪事，係無看

著這項，總試著無像無像，頭擺个粢粢，係用糯米飯放在掌油个舂白肚，一儕舂、一儕搥<sup>5</sup>，舂到又軟又韌，正摻地豆麩還過糖粉攪共下來做底，歸大坵斷好香噴噴个粢粢放在面頂，用兩枝箸準剪刀來剪，剪好个粢粢，大人細子相爭挾，又好搞又好食！

係講著客家人个版圓，有大隻个、有細隻个；有包料个、有無包料个；有甜个、有鹹个，隨在人擇，總做得擇著自家中意个。有一種接到大嫲隻，撇扁來中央又加撇一隻窟，焗浮撈起來，放落老薑嫲、烏糖水滾到醃醃个湯肚，委兜地豆碎摻等食，這就係一等有名个客家燻湯粢，也有人講安到牛搵水，有兜人生成毋好食甜，摻粢粢抑係燻湯粢拿來浸燻肉味，該又係另外一種醃醃个鄉情味咧！

客家菜个好味緒，餵人又生趣，逐樣都恁好食，四炆四炒、客家炒肉、豬肺炒鹹酸甜、剁毛蟹醃、菜包、豬腸炒薑絲、鹹菜乾剁豬肉，三日三夜也講毋煞，口水溶溶跌，毋知愛仰結煞正好哪！

<sup>1</sup> 菜蓋：音 coi` hab；指蔬菜外層較老較黃的葉子。

<sup>2</sup> 燻：音 sau；入熱水鍋滾過再撈起。

<sup>3</sup> 撩：音 liau`；炒、翻。

<sup>4</sup> 金頭：音 gim` teu；又金又亮的樣子。

<sup>5</sup> 搥：音 boi`；用手撥開。

【伯公下】邱一帆原作

記得正上小學時節，在伯公下搞到斷烏無半夜，無想著莊肚伯公個大門嘎分人鎖起來，共伴個一隻一隻像猴仔樣攀過圍牆出去，單單伸佢一儕在伯公下個大門肚。心急之下，乜想蹶上該鎖忒個大門、攀過大門轉屋下去，一無注意，大門頂高像箭樣個細鐵精，好死毋死就撞爛衫褲，刺落佢個左手腋下，阿姆哀，衰過正得，黏時就血流血著，痛到耐毋得！好得大人看著遽遽摻佢拗下來，送去分先生止血、消毒、包藥仔。記得該暗晡當恬靜，無分大人罵，乜無食著大人專門為做毋著事個細人仔準備個「竹筱版」。這下，逐擺看著左手腋下個一點疤，就想起小南埔伯公下個故事。

還記得伯公下圍牆脣頭，有一叢牛眼樹，到了避暑就會結出一畚<sup>1</sup>一畚個牛眼，探落<sup>2</sup>伯公下這片來。該係在伯公下搞寮個細人仔最好個零嗒，較高個人伸手就摘得著，較矮個人就愛練會爬牆蹶樹伶俐個功夫，係無，正經會搶毋著來食！食伸個牛眼核，毋會打爽，搞伴會拿來做圓子<sup>3</sup>搞，講也奇怪，佢會搞到有意有思！

<sup>1</sup> 一畚：音 rhid po`；一把或一串。

<sup>2</sup> 探落：音 dam`log`；伸進來。

<sup>3</sup> 圓子：音 rhan zii'；彈珠。

伯公個後背有一頭香花，佢個名仔聽講安到——夜來香，到了開花個時節，斷烏開始就會散放醜醜個香氣。伯公下貪搞個細人仔，總會帶等香味轉屋下，該時節，歸莊個人當像就鼻得著該夜來香味。

伯公下，係佢做細人仔時節搞寮個地方。逐日放學，小南埔莊肚個細人仔打紙牌、射樹乳仔、搞圓子，大體就會行到伯公下。麼人較會搞、麼人較蠢<sup>4</sup>、麼人較奸宰？在搞個過程全全展現出來，搞伴目金金，伯公乜看現現。佢輒常在該想，假使童年係一齣比賽輸贏個戲，莊肚個伯公下，就係最打眼個舞臺。舞臺頂無刀光劍影，毋過有紙牌仔、樹乳仔、圓子、還有搞伴；舞臺頂無血流血著個場面，但係有緊張、刺激個心情；舞臺頂無刻情個評審，但係有笑微微個伯公，永久，深深刻在童年個畫面裡肚。

伯公下係佢童年重要個舞臺，所有在舞臺頂演出過個人，佢還記得：共綱個搞伴，隔壁武頓個阿戊伯公，當虔誠奉祀清瘦個伯公，慈祥個阿戊伯婆晒鹹菜個身影，輒常食酒醉講心事個阿富伯……，全全還留在佢個印象裡肚。年紀緊來緊大，想著伯公下，就想起童年時節；想起莊肚，想起自家莊肚個人。這下，小南埔莊肚個伯公下既經無圍牆、無大門，乜無細人仔在該停跔搞寮。毋過，還做得看著莊肚人帶等自家個子女，過年過節在該敬伯公。

<sup>4</sup> 蠢：音 ngong`dong`；呆愚。